



## VIVÀE DEN LÉS CHARÉRES

**Q**ui que l'étét le Freddy mort a Lens en 2017, mé que le couneüs-siant pa la date ? Qui que l'étét çhaul oume qu'avét pa de num ni de petit-num, qu'avét ine véntaene d'annàies, li-tou, mort le 5 de fouvraè à Menton ? Qui qu'al étét çhéle prsone morte le 5 de décembre a Toulouse ? Coume o se pet o, que den le moument que lés viles avant véngnu « *intelligentes* », adounàies de prtout, o se lijhe qu'ine prsone ét morte a Toulouse, ine prsone qu'at pa de num, ni d'éjhe, ni de séxe ?

Oi ét ine tirolàie qui prnit quatre pajhes den le jhornàu *La Croix* qu'at paraeghu çhés jhours. En balouinant dessus, o devént ine quésciun, é o doune grande pour. O s'y trouve la tirolàie de prsones

mortes den la France, a maeme la charére, l'annàie passàie. A sant renjhàies pr la date de la mort, a cha moes. Tout pllén d'oumes, çhauques fames. A daus fés, l'avant in num, coume le Kiril Lambez, qu'avét 84 ans, qu'ét mort a Paris den le XVIII<sup>ae</sup>, en mar. Déque fasét éll den la charére a çhéle éjhe ? Mé, le mae d'entr yeùs avant rén qu'in petit num coume Ahmed, 27 ans, le 10 de jhén à Troyes. Ou Bén Sébastien, « den l'étai ». É voé, ol ét de ce qui pet se

lire aneùt su la mort d'in oume. Çhés tràes mots la, coume épitafe.

A cha annàie, dau dépeùs Bén dau tenp, en 2002, ine parçounerie, qui se noume « les morts de la rue », fét la tirolàie daus morts den l'annàie. Pr coumençàe, ol ét in petit d'onour pr yeùs. É peu, ol ét de métre en garde çhés qui vivant. De lour faere assaver que vivàe den la charére o détance le monde pr mourir. Ol ét de dire a trtouts que çhés façuns de



### Den çhau limérot :

Vivàe den lés charéres...1-2

Roselyne ét partie...2

Voure ol ét de quésciun dau traen pi dau çhu daus chevàus...3

Molichou é Garçounière...4-5

Maroe Bésér...6-7

Ounour a Pèire Bec... 8

### site de la pajhe 1

mourir sant le mae souvent violentes. De faere atenciun pr que lés funérajhes se fasant den la dégnetai. É peù acunpagnèe lours couneùssences den le déll.

O se trouve ine céncantaene de parçouneries qu'aedant lés sen-abric qui fasant partir de çhau ramouceli. Çhau ramouceli, l'avant deùs travallours payais é deùs àutres qui fasant lour « service civique ». Cuntàe lés morts, ajhudàe lours couneùssences den le déll (émis, famelle, vesins, maraudours, travallours souciàus), prpousàe daus assavements aus parçouneries pr lés ajhudàe a ce qu'a fasant lours façuns a lais, pr la manière d'acotàe a la mort daus prsounes que l'acunpagnant, etc.

Cunbén qu'ol oghit de morts l'annàie passàie ? 510, sen cuntàe çhés qu'i soghirun pa lour mort. Cunbén de prsounes sen mésun a tenir den la France ? 143000 qu'o dit « l'Insée », mé çheù, ol étét ol at quatre annàies. Dau dépeùs, o fét que de craessàe. Cunbén qu'ol at de pllaces den lés aséles é lés

endrèts d'arbérjement ? 134000. Coume disant lés parçouneries qui fasant pr s'éçhupàe de çhés endrèts, o regoule.

« I veù pu aver daus fames, daus oumes den les charères, den lés boes ou ben prdus a la fin de l'annàie », qu'o garochit Macron en jhullét deràe. Ol ét çhurios, que lés oumes de la poulétique ayiant çhéle acoutumance de faere daus proumèsses d'ine si grouse goulàie. Hollande z-ou avét proumis, zéro SDF, Sarkozy étou, é maeme Jospin. Aver la prtenciun que le monde en veyiant pu yin d'in cop de

baghète majhique, ol ét lour afaere. Sultout qu'apràe, le fasant la cuntrère de ce que l'aviant proumis. Le gouvernement a Macron goce lés APL, le fét ghétàe lés endrèts d'arbérjement pr lés jhendarmes pr faere la trie entrmi çhés qu'avant le drét de y être peù lés àutres...

Pendant çhau tenp, ol at de mae en mae de prsounes a vivèe den lés charères. L'ivér ét passàie mé a mourant étou.

*Chebrét*



*Roselyne Carpentier (deùsiaeme a gàuiche) a la Sént-Jhan 2018 a Moulin Séc a La Roche. Roselyne animét l'atelàe de chançons de La Soullère. Al étét de la parçounerie dépis lés coumençements. A chantit Gusteau den le récital de chants de Nàu, a chantét Guyonnet... I aemàe bae quant a jhouét sa chançon. Réjhente, a fasil venir lés musicours de La Soullère den sés cllases. A fut de part den bé daus animaciuns, Roselyne, trjhou de la boune afaere. I l'aemiun é vela qu'al ét partie dépis in matin de çhét étai.*

*Micha*